

Na osnovu člana 21.a Zakona o zaštiti ličnih podataka Bosne i Hercegovine („Službeni glasnik BiH“, broj: 49/06, 76/11 i 89/11), člana 85. Pravila Škole, Školski odbor na sjednici, održanoj dana 15.05.2018. godine d o n o s i

**P R A V I L N I K**  
**O VIDEONADZORNOM SISTEMU**  
**U Javnoj ustanovi „Četvrta osnovna škola“ Ilidža-Hrasnica**

**I PREDMET PRAVILNIKA**

**Član 1.**

Pravilnikom o videonadzornom sistemu u Javnoj ustanovi „Četvrta osnovna škola“ Ilidža-Hrasnica (u daljnjem tekstu: Pravilnik) bliže se određuje uspostava, pravni osnov, svrha, upotreba videonadzornog sistema u prostorijama škole i u dvorištu škole i opseg podataka.

**II ODLUKA O VIDEONADZORNOM SISTEMU**

**Član 2.**

Školski odbor Javne ustanove „Četvrta osnovna škola“ donosi odluku o uvođenju videonadzornog sistema u školi.

**Član 3.**

Bliže odredbe o uspostavi, svrhi, upotrebi, zaštiti i obradi ličnih podataka i završnim odredbama vezanim za videonadzor definišu se ovim Pravilnikom.

**III ZAKONSKI OKVIR**

**Član 4.**

Zakon o zaštiti ličnih podataka Bosne i Hercegovine član 21.a predviđa uspostavu videonadzornog sistema.

**Član 5.**

U skladu sa Pedagoškim standardima i općim normativima za osnovni odgoj i obrazovanje i normativa radnog prostora, opreme nastavnih sredstava i učila po predmetima za osnovnu školu predviđena je uspostava odgovarajućeg videonadzornog sistema u osnovnim školama.

**IV SVRHA VIDEONADZORNOG SISTEMA**

**Član 6.**

Svrha uspostavljanja videonadzornog sistema u Javnoj ustanovi „Četvrta osnovna škola“ je neophodna optimizacija sigurnosti učenika, radnika, roditelja i posjetioca škole, u toku nastavnog procesa u prostoru škole i školskog dvorišta; sigurnost objekta i imovine škole u periodu kada se ne izvodi nastavni proces (noćni sati, vikendi, neradni dani i blagdani, periodi kolektivnih godišnjih odmora); u svrhe predviđene Pravilnikom o kućnom redu sa etičkim kodeksima.

**Član 7.**

Dozvoljena je upotreba videonadzornog sistema u smislu vođenja evidencija u skladu sa članom pozitivnim propisima Zakona o radu Federacije Bosne i Hercegovine, kada je to određeno zakonom ili ako je to potrebno radi ostvarivanja prava i obaveza.

**V OPSEG PODATAKA VIDEONADZORA**

**Član 8.**

Videonadzorni sistem škole obuhvata:

- a) Unutrašnje kamere i vanjske kamere.
- b) Nadzorne kamere imaju IR noćno snimanje i osjetljive su na pokret.
- c) Uređaj za pohranu videozapisa deponuje i arhivira videozapise 1 sedmicu /7 dana/, nakon čega se isti automatski brišu.

### **Član 9.**

Unutrašnje kamere pokrivaju glavne koridore, hodnike i komunikacije unutar škole kao i hodnik prema zbornici i prostorijama uprave škole gdje se deponuju matične knjige, registri i dokumentacija od trajnog značaja za rad škole.

### **Član 10.**

Vanjske kamere pokrivaju prostor dvorišta škole, ulaze u školsko dvorište i prostor školskog parkinga.

### **Član 11.**

Na ulazu u školu i oko školskog dvorišta postavljaju se vidljivi znaci obavijesti:

**PAŽNJA OBJEKAT POD VIDEONADZOROM.**

Znak na samom ulazu u školu sadrži i kontakt telefone preko kojih se mogu dobiti opće informacije o videonadzoru.

## **VI UPOTREBA PODATAKA**

### **Član 12.**

Uređaj za snimanje i administratorski centar videonadzornog sistema nalazi se u portirnici ili u kancelariji kod direktora škole.

Direktor škole može ovlastiti i drugo lice da ima pristup administraciji videonadzornog sistema škole u svojstvu kontrolora, kada direktor nije prisutan u školi.

### **Član 13.**

a) Kontrolor videonadzornog sistema jeste direktor škole kao odgovorno lice.

b) Kontrolor je odgovorno lice koje ima pristup monitoringu u realnom vremenu i arhivi videonadzora, te može slobodno da pristupa podacima i obrađuje podatke videonadzora u skladu sa članom 21.a Zakona o zaštiti ličnih podataka Bosne i Hercegovine.

c) Podacima u smislu stava b) ovoga člana ovlašteno lice, u skladu stava a) ovoga člana, ima u prostorijama škole ili ukoliko se ukaže mogućnost - putem IP veze sa druge lokacije ili mobilnog uređaja.

### **Član 14.**

Pristup administraciji videonadzora, monitoringu i obradi podataka imaju i ovlaštene policijske agencije i ministarstva unutrašnjih poslova u Bosni i Hercegovini uz predočenje validnog naloga.

### **Član 15.**

Monitoring u realnom vremenu nad videonadzorom imaju i noćni čuvari škole ili druga lica koja ovlasti direktor škole.

## **VII ZAŠTITA LIČNIH PODATAKA**

### **Član 16.**

U skladu sa članom 21.a Zakona o zaštiti ličnih podataka Bosne i Hercegovine obezbjeđuje se zaštita i obrada ličnih podataka prikupljenih putem videonadzora:

a) Snimci pohranjeni putem videonadzora na određenom prostoru na osnovu kojih se može identificirati nosilac podataka predstavljaju zbirku ličnih podataka.

b) Kontrolor koji vrši videonadzor dužan je donijeti odluku koja će sadržavati pravila obrade s ciljem poštivanja prava na zaštitu privatnosti i ličnog života nosioca podataka, ako videonadzor nije propisan zakonom.

c) Kontrolor koji vrši videonadzor dužan je na vidnom mjestu istaći obavještenje o vršenju videonadzora i kontakt putem kojeg se mogu dobiti pojedinosti o videonadzoru. Direktor, kao ni bilo koja druga osoba, ne smije koristiti podatke o osobama prikupljene videonadzornim sistemom zaštite izvan njihove zakonske namjene, a raspolaganje snimcima dopušteno je samo direktoru škole.

#### **Član 17.**

Pravilnik podrazumijeva poštivanje propisa Zakona o radu u Federaciji Bosne i Hercegovine, koji se odnosi na postupanje sa ličnim podacima radnika- kada je to propisano zakonom ili ako je potrebno radi ostvarivanja prava ili obaveza radnika.

### **VIII PRIJELAZNE I ZAVRŠNE ODREDBE**

#### **Član 18.**

Pravilnik stupa na snagu danom donošenja.

#### **Član 19.**

Za tumačenje odredbi ovog pravilnika nadležan je Školski odbor.

#### **Član 20.**

Izmjene i dopune Pravilnika vrši Školski odbor na isti način kako je i donesen.

#### **Član 21.**

Javnost se upoznaje sa sadržajem ovoga Pravilnika putem službene web stranice škole i oglasne ploče.

  
Datum: 15.05.2018.godine

Predsjednica Školskog odbora  
